

## ※ 《善生經》節錄

東晉罽賓三藏瞿曇僧伽提婆譯

如是夫觀妻子。夫當以五事愛敬供給妻子。云何爲五。

一者憐念妻子。

二者不輕慢。

三者爲作瓔珞嚴具。

四者於家中得自在。

五者念妻親親。

夫以此五事愛敬供給妻子。妻子當以十三事善敬順夫。云何十三。一者重愛敬夫。二者重供養夫。三者善念其夫。四者攝持作業。五者善攝眷屬。六者前以瞻侍。七者後以愛行。八者言以誠實。九者不禁制門。十者見來讚善。十一者敷設床待。十二者施設淨美豐饒飲食。十三者供養沙門梵志。妻子以此十三事善敬順夫。……居士子。若人慈愍妻子者。必有增益則無衰耗。

## ※ 《玉耶女經》節錄

東晉天竺三藏竺曇無蘭譯

佛告玉耶。婦事姑妯夫婿。有五善三惡。何等爲五善。

一者爲婦當晚臥早起。櫛梳髮綵整頓衣服。洗拭面目勿有垢穢。執於作事先啓所尊。心常恭順。設有甘美不得先食。

二者夫婿呵罵不得瞋恨。

三者一心守夫婿。不得念邪姪。

四者常願夫婿長壽。出行婦當整頓家中。

五者常念夫善不念夫惡。是爲五善。

何等爲三惡。

一者不以婦禮承事姑妯夫婿。但欲美食先而噉之。未冥早臥日出不起。夫欲教呵瞋目視夫。應拒猶罵。

二者不一心向夫婿。但念他男子。

三者欲令夫死早得更嫁。是爲三惡。玉耶默然無辭答佛。佛告玉耶。世間有七輩婦。

一婦如母。二婦如妹。三婦如善知識。四婦如婦。五婦如婢。六婦如怨家。七婦如奪命。